

♥ PENANG

1 - 15 MAC, 2023



PENANG  
2030

PERCUMA

# BULETIN MUTIARA



www.buletinmutiara.com



buletinmutiara | ChowKonYeow



chowkonyeow



@ChowKonYeow



KEPELBAGAIAN produk yang dihasilkan.

AZHAR Arshad (duduk, berbaju Melayu) mengetuai delegasi MBSP menyerahkan set kitar semula khas kepada Ketua Menteri Pulau Pinang baru-baru ini.



ANTARA produk yang dicipta menggunakan tayar dan kayu terpakai.

## UNIT UPCYCLE MBSP

### cipta produk kreatif demi komuniti

**S**ESETENGAH masyarakat mungkin memandang barangan terbuang seperti tayar, kayu, tong dram dan lain-lain hanya sebagai sampah semata-mata.

Namun, berbeza pula dengan Unit Upcycle Jabatan Perkhidmatan Perbandaran (JPP) bagi Majlis Bandaraya Seberang Perai (MBSP) yang berupaya menukar bahan-bahan buangan tersebut kepada produk baharu yang lebih bermanfaat.

Penulis Buletin Mutiara, WATAWA NATAF ZULKIFLI bersama-sama jurugambar, DARWINA MOHD. DAUD sempat mendekati pasukan berkaitan yang diketuai MOHD. SABRI MOHD. SIDIK untuk mendapatkan maklumat lanjut.

Menurut Mohd. Sabri, idea untuk melaksanakan projek *upcycle* muncul atas kesedaran untuk mengurangkan penghasilan sampah terutamanya di Tapak Pelupusan Sampah Pulau Burung.

“Idea ini kemudiannya dilaksanakan buat pertama kali di depoh MBSP dekat Seberang Perai pada tahun 2016.

“Selepas itu, pada tahun 2017 kita berjaya mewujudkan ‘Taman Upcycle’ pertama di Malaysia bersebelahan Menara Bandaraya (MBSP) yang mana ia turut mendapat pengiktirafan daripada *Malaysia Book of Records* (MBOR).

“Tambahan pula, sepertimana yang kita sedia maklum, MBSP merupakan Kerajaan Tempatan nombor satu di Malaysia bagi kadar kitar semula

tertinggi,” ujarnya ketika ditemui dekat Depoh Pembersihan MBSP Kepala Batas pada 25 Januari lalu.

Mohd. Sabri memberitahu bahawa Unit Upcycle JPP MBSP sangat kreatif dalam menghasilkan rekaan hiasan baharu untuk diletakkan di tempat bersesuaian seperti halaman rumah, taman-taman awam dan tempat-tempat lain.

“Mereka ini kreatif, bak kata orang tangan itu ‘menjadi’ bila reka hiasan-hiasan buatan tangan yang dihasilkan dengan teliti.

“Selain membuat produk-produk *upcycle*, unit tersebut turut berperanan menyelenggara kebuk-kebuk pembuangan sampah di jalan raya supaya berada dalam keadaan baik,” katanya sambil merakamkan

penghargaan kepada Datuk Bandar MBSP, Dato’ Azhar Arshad dan Pengarah JPP MBSP, Ahmad Zabri Sarajudin kerana tanpa jemu memberi sokongan kepada Unit Upcycle JPP untuk menghasilkan pelbagai rekaan menarik.

Buletin Mutiara dalam pada itu, turut berkesempatan menemu bual salah seorang lagi kakitangan unit berkaitan, AZIZUL ABDUL RAHIM.

Menurut Azizul, beliau dan rakan-rakan mempunyai lebih daripada 40 rekaan khas produk *upcycle* setakat ini.

“Pasukan kami dipecahkan kepada beberapa kumpulan mengikut kepakaran masing-masing seperti bahagian kayu, tong dram dan tayar.

(Sambungan di muka 2).

(Sambungan dari muka 1).

# Rekaan teliti buatan tangan



**AZIZUL Abdul Rahim (duduk, tiga dari kiri) dan Mohd. Sabri Mohd. Sidik (duduk, tiga dari kanan) bersama-sama pasukan Unit Upcycle JPP MBSP ketika ditemui dekat Depoh Operasi Pembersihan Taman Bertam Indah baru-baru ini.**

“Selain daripada Taman Upcycle di MBSP, ‘karya-karya’ pasukan kami turut ditempatkan di *Upcycle Lane* Taman Tunku, Seberang Jaya dan di Taman Merbau sebagai landskap,” ujarnya.

Kepakaran Unit Upcycle MBSP tidak hanya memberi manfaat kepada komuniti, bahkan kreativiti mereka turut dikongsikan kepada sekolah-sekolah di sekitar Seberang Perai.

Difahamkan, sebanyak 10 sekolah terlibat dengan bengkel berkaitan antaranya, Sekolah Kebangsaan (SK) Lahar Yooi, SK Pengkalan Jaya, SK Bagan Ajam, SK Bumbung Lima, SK Ara Rendang dan SK Padang Menora.

Turut terlibat, Sekolah Menengah Kebangsaan (SMK) Datuk Haji Ahmad Badawi, Sekolah Menengah Kebangsaan (SMK) Telok Air Tawar, SMK Dato Onn dan SMK Kampung Kastam.

“Atas permintaan umum, kami turut membuka tempahan dan jualan

kepada orang ramai pada harga yang berpatutan.

“Namun, hasilnya bukanlah ke poket sendiri, sebaliknya dimasukkan sebagai hasil kepada MBSP.

“Harga perabot yang dihasilkan contohnya, dijual pada anggaran harga RM400 hingga RM800 bergantung kepada jenis dan permintaan daripada pelanggan,” ulasnya lanjut yang turut menghasilkan barangan kegunaan lain seperti tempat gantung kunci, peti surat, tabung dan bermacam-macam lagi.

Tambah Azizul, koleksi rekaan sesetengah perabot juga adalah bernilai tinggi kerana mempunyai logo MBSP yang dihasilkan dengan tangan tetapi tetap dijual pada harga yang berpatutan.

Tambah beliau, terdapat sesetengah produk seperti pelekat adalah dilukis sendiri, kecuali bahagian ukiran yang dibuat menggunakan gabungan seni tangan serta mesin ukir.



**BARANGAN buangan yang bakal dikitar semula.**

“Jadual harian untuk cipta sesuatu barangan juga kita buat untuk selaraskan semua projek bagi memastikan produk-produk ini siap pada masa yang ditetapkan.

“Contohnya, kita akan atur minggu ini kita hendak buat apa...sama ada pasu, motosikal, burung, kerusi atau lain-lain,” jelasnya yang bersama-sama pasukannya akan mencari sendiri bahan-bahan terbuang tersebut di kedai atau kilang.

Walau bagaimanapun kata Azizul, tanpa pembelajaran, mustahil untuk seseorang menguasai kemahiran-kemahiran dalam mencipta barangan baharu menggunakan barangan terbuang tersebut.

“Kami masing-masing belajar antara satu sama lain, tidak kurang juga tengok dalam *Youtube* berkenaan video-video *upcycle* yang ditunjukkan.

“Jabatan letak sasaran lima produk dalam masa sebulan, bergantung kepada

saiz mengikut permintaan orang ramai selain permintaan daripada Ahli Majlis MBSP sendiri untuk kawasan masing-masing.

“Terdapat juga pihak berkuasa tempatan (PBT) yang datang ke MBSP dan buat lawatan ke *Upcycle Lane* untuk melihat hasil yang dicipta.

“Malah, pasukan kami sedang menyiapkan sebuah jam dinding untuk disampaikan kepada Yang Dipertua Negeri (TYT) dengan menyematkan gambar beliau bersama-sama isteri yang dijangka siap dalam masa terdekat,” katanya menutup bicara.

Difahamkan, antara kenamaan lain yang pernah menerima cenderahati berupa produk *upcycle* berkaitan termasuk Ketua Menteri Y.A.B. Tuan Chow Kon Yeow; Ketua Setiausaha Negara, Tan Sri Zuki Ali dan Ketua Setiausaha Kementerian Pembangunan Kerajaan Tempatan (KPKT).



**DEPOH Operasi Pembersihan Taman Bertam Indah yang merupakan ibu pejabat Unit Upcycle JPP bagi MBSP.**

